



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

2. Kalenderwoche – ab 09. Januar 2011

Mammuds

Nee, wasses alles gähm dud! De Amis ham zusamm mid de Russn rausgeforscht, was de Mammuds dazumals in dor Eiszeit fiehr Gene gehabd ham. Die Forschorgrubbe had das Erbguhd aus Resde von Knochn endschlisseld, die se ohm in Sibirjen gefundn haddn. Das Erbguhd soll zu 99 Brozend mid dähm Erbguhd von de heidischn Ehlefandn ieboreinschdim. Die dun ja heide vorwieschend in Afriga lähm - de Ehlefandn.

Ja, da missn also ma irschendwann in grauor Vorzeit de Mammuds aus Sibirjen abgehaun sein un ham sich dann in Afriga angesiedld un sinn dann zu Ehlefandn gewordn. Was mor ja vorschdehn kann - die Scheißkälde in Sibirjen! Liebor ma bißl schwidzn!

Eene Idee däde nu sein, wenn se das Mammud jedzde nachbaun dädn. Ardenreddung! Das Genohm hammse.. - warum nisch? Zum Beischbiel bei "Ohbl"!

Dor Audohährschdellor "Ohbl" däde sich beschdimmd sähr guhd eischnen, so uhrzeitliche Diere wie das Mammud in Serje zu broduziern. Die sin doch schon seid Jahre ooch mid ihre Audos in dähr Rischdung marschierd. Mähr odor wenis chor erfolchreich.

Un dann - dor Schdandord in Risslsheim däde sich ja schon vom Name hähr fiehr Mammudbrodugsjohn anbietn. Mammuds hamm ja ooch große Rissl!

Un ooch sonsd - so e Mammud kennde e guhdes Aushängeschild fiehr de Firmenbolledig sein.

Zwee Grundbeschanddeile von dor Firmenbolledig bei "Ohbl" dun ja sozusachn im Mammud drinneschdeggn. Eema dor Muhd un zum zweedn dor Mammon!

Dähn Mammon kennse nisch? Dor schneede Mammon is das, wenn eenor bloß noch nachm Geld schdrähm dud! Ja, isch kenne dähn schneedn Mammon - wenn ooch flischdisch! Nee, wensde gahr nisch nachm Geld schdrähm dusd... alleene vom Ruhm kannsde nisch lähm!

Also, dähn Muhd solsche Mammuds hährzuschdelln, dähn ham die bei "Ohbl"! Dähn Mammon missde dann ehm das Land Hessn dazugähm. Weeschn Erhaltung von Arbeidsblädze! Wenn dann alles scheen glabbn däde, kennde villeischd schon in diesem Jahr dor erschde Mammud in Risslsheim vom Band loofn. Mid Rissl! Un nadihrlich mid Hühbridandrieb!

So e Mammud leefd ja mid Wassor genauso guhd als wie mid Gras. Eene Füllung dud ungefähr fiehr 500 Gilomedor reischn. De CO-zwee Abgaswährde missn allordings noch verbessord wern. De Mammuds dun irschendwie zu Blähung neischn. De EU-Gränzwerde dun ooch fiehr Mammuds geldn. Daderfiehr dud abor e Mammud im Windor keene Schneekedd n brauchn un ooch keene Windorreefn. Seidnabbrallschudz un Schdoßzähne wern serjenmäßisch midgelieford.

Un wenn sisch "Ohbl" nisch fiehr de Brodugsjohn endscheidn dud, dann dun schon de Schine hsn daschdehn - Gewähr bei Fuß! Die dun dann dähn Mammud mid Schlidzoochn ausschdaddn. Un mid Wegloofschberre!

Eduard Sachsenmeyer